

ԺՈՂՈՎՐԴԱԿԱՆ ԱՎԱՆԴՈՒԹՅՈՒՆՆԵՐԻ ԷՈՒԹՅՈՒՆՆ
ՈՒ ԺԱՆՐԱՅԻՆ ԱՌԱՆՁՆԱՀԱՏԿՈՒԹՅՈՒՆՆԵՐԸ

Ա. Տ. ՂԱՆԱԼԱՆՅԱՆ

Ավանդությունները ժողովրդական բանահյուսության քիչ հետազոտված ստեղծագործություններից են: Մեղ հայանի չէ նրանց էությունն ու ժանրային առանձնահատկությունները բացահայտող որևէ ուսումնասիրություն՝ ո՛չ հայ և ո՛չ էլ այլ լեզվով: Ներկա աշխատանքը մի փորձ է այդ ուղղությամբ, կատարված ընդհանրապես ավանդությունների և հատկապես հայոց ավանդությունների մեր հավաքած հարուստ նյութերի հիման վրա՝ հայ դասական հեղինակներից մի քանիսի համադաստասիան առույթների ու մտքերի օգտագործումով:

1

Ավանդությունները էպոսի նման ժողովրդական բանահյուսության առավել ազգային և ուշագրավ ստեղծագործություններից են և ունեն ինչպես ճանաչողական, այնպես էլ գաղափարական ու գեղարվեստական նշանակալից արժեք: Դրանք ծագել ու ձևավորվել են բնությունից և պատմական իրականությունից մարդկանց ստացած անմիջական տպավորությունների ու ընկալումների հիման վրա: Սկզբնական շրջանում ավանդությունները կրել են շոշապատի իրականության, պատմական կոնկրետ դեպքերի ու դեմքերի, իրերի ու երևույթների վերաբերյալ ժամանակակիցների ու ականատեսների հաղորդած յուրօրինակ բանավոր պատմումների ու վերհուշերի կերպարանք: Ժամանակի ընթացքում, սակայն, դրանց որոշ մասը ունենալով հետաքրքիր բովանդակություն և դրավիչ պատմելաձև անցել է բերնե-բերան և տարածվել հասարակության լայն խավերում: Ժողովրդի մեջ իրենց սնեցած երկարամյա կենցաղավարության հետևանքով, քննության առարկա պատմումների ու հաղորդումների առանձին մանրամասներ աստիճանաբար մոռացության են տրվել՝ կամ էլ դրանք հետզհետե լրացվել ու հարստացվել են իրական կյանքից վերցված նոր դրվագներով: Միաժամանակ, այդ պատմումներն ու հաղորդումները անցնելով հավաքական ստեղծագործության բովով, կամաց կամաց ձեռք են բերել վիպական բանահյուսության երկերին հատուկ գույն ու երանգ, գեղարվեստական համապատասխան արտահայտչականություն: Նրանց մեջ հանդես եկող իրական-պատմական դեմքերը աստիճանաբար վեր են ածվել գեղարվեստական ընդհանրացում-կերպարների, օժտվելով հասարակական այս կամ այն խավի ներկայացուցիչներին հատուկ տիպական զծերով, հղկվել ու բյուրեղացել է նրանց կառուցվածքը, լեզուն և ոճը, ձևավորվել ու կայունացել են պատկերները: Այդ բոլորի հետևանքով, դեպքերին ժամանակակից-ականատեսների եր-

բեմնի սովորական ու հասարակ պատմումներն ու վերհուշերը, ժամանակի հուշվումով ձեռք են բերել ժանրային յուրահատուկ նկարագիր և ժողովրդական ավանդության կերպարանք մտած դարձել հոծ զանգվածների սեփականությունը:

Ժողովրդական ավանդությունների մեջ, սվյալ երկրի աշխատավոր մեծամասնության գոյի ու գիտակցության խորը տեղյակության հիման վրա, խոստով գրվագներով, կենդանի կերպարներով և գունեղ պատկերներով արտացոլված է նույն այդ երկրի բնաշխարհն իր բնորոշ առանձնահատկություններով, ժողովրդական կյանք ու կենցաղի, բարքերի ու հավատալիքների ուրույն պատկերը, ժամանակի տնտեսական-հասարակական, քաղաքական և մշակութային երևույթներն ու հասկացողությունները, տարբեր ցեղերի ու ցեղախմբերի, տոհմերի ու տոհմակցությունների ծագումն ու փոխհարաբերությունները, նրանց առաջնորդների կյանքն ու մղած կոիվները, զանազան դասերի ու դասակարգերի միջև գոյություն ունեցող հակասություններն ու պայքարը և այլն:

Ավանդությունները պետք է դասել ժողովրդական բանահյուսության վիպական ժանրի ստեղծագործությունների շարքը:

Տվյալ ժանրի մնացած բոլոր հիմնական ստեղծագործությունների (առասպել, հեքիաթ, վեպ, առակ) նման նրանք արտաքին աշխարհը՝ բնությունը և մարդկային-հասարակական կյանքի երևույթներն ու հարաբերությունները պատկերացնում, վերարտադրում են առարկայացված ձևով և պատմողական եղանակով:

Վիպական բանահյուսության մյուս ստեղծագործությունների հետ ունենալով էական ընդհանրություններ, ավանդություններն օժտված են նաև ոչ պակաս կարևոր յուրահատկություններով, որով և նրանք առանձնակի տեղ են գրավում հիշյալ ստեղծագործությունների շարքում:

Դիցարանական առասպելների նման ավանդությունները ևս համեմատաբար փոքր ծավալի մեջ արտացոլում են վաղնշական մարդկանց պատկերավոր մտածողության տարրերը, նրանց երևակայության մեջ և այդ երևակայության միջոցով անգիտակցական և զեղարվեստական եղանակով մշակված բնությունն ու հասարակական ձևերը¹, առանց սակայն աստվածացնելու բնության երևույթներն ու մարդկանց, որը դիցարանական առասպելների ամենաբնորոշ հատկանիշն է:

Հայոսի նման ավանդությունները ևս արտացոլում են սվյալ ժողովրդի իր ինքնորոշման համար մղած դարավոր ազատագրական պայքարը, նրա ազգային բնավորության ուրույն գծերը, պատմական ճակատագիրը, աշխատանքային առօրյան, վարքն ու բարքը, այն էական տարբերությամբ, սակայն, որ մինչդեռ Հայոսի մեջ այդ ամենը տրված է բազմազան ու հարուստ սյուժեի ու կերպարների միջոցով, ավանդությունների սյուժեն անհամեմատ ավելի սահմանափակ է, կերպարները եզակի, ծավալը բազմապատիկ փոքր:

Առակների նման ավանդությունների մեջ ևս զգալի տեղ են գրավում կենդանիներն ու բույսերը, այն տարբերությամբ միայն, որ եթե առակները այլաբանական ստեղծագործություններ են և կենդանին ու բույսն այստեղ ծառայում են լոկ իբրև միջոց մարդկային-հասարակական հարաբերությունները

¹ Կ. Մ - բ բ ս. Քաղաքատնտեսության քննադատության շուրջը, Երևան, 1948, էջ 271:

բացահայտելու, շարն ու վատը մերկացնելու, քննադատելու և ծաղրելու, բարին ու լավը դրվատելու և քարոզելու համար, ապա ավանդությունները քիչ են աղերսվում այլաբանության հետ և կենդանիներն ու բույսերը նրանց մեջ հանդես են գալիս ոչ այնքան իբրև օբյեկտ կամ միջոց, որքան իբրև ինքնակախակներ ու առարկաներ՝ իրենց ծագումով, կենսագրությամբ և բնորոշ առանձնահատկությունների նկարագրությամբ:

Շփման որոշ կետեր կարելի է գտնել նաև հեքիաթների և ավանդությունների, հատկապես իրապատում հեքիաթների և ավանդությունների միջև: Դրանք են երկուսի մեջ առկա՝ կենսական երևույթների ու հաբարբերությունների առավել ճշմարտապատում վերադարձությունը, փոխ ծավալը, դրվագային սյուժեն, պարզ կառուցվածքը, պատմելու ռեալիստական ոնր և այլն:

Կան ավանդություններ էլ, որոնք մասամբ աղերսվում են հրաշապատում հեքիաթների հետ: Դրանք այն ավանդություններն են, ուր իրադարձությունների շարադրանքը միահյուսվում է հեքիաթային ֆանտաստիկայի հետ և որոնցում իբրև արտահայտչական միջոց կարևոր դեր է խաղում շափազանցությունը: Նման ավանդությունները առաջին հայացքից թողնում են կոնկրետ տեղից ու ժամանակից կտրված հնարանքների տպավորություն: Սակայն սուր աչքը հեքիաթային ֆանտաստիկայի ետնախորշում նրանց մեջ կարող է նկատել ունայ իրականության տարրերը, բուն պատմական ճշմարտությունը:

Ընդհանրացնելով մեր ասածը ժողովրդական ավանդությունների ժանրային նկարագրի վերաբերյալ, կարող ենք հանդել հետևյալ բնութագրություն-սահմանմանը. ավանդությունները ծավալով փոքր, երբեմն մի քանի նախադասությունից միայն բաղկացած, կես իրական, կես ստեղծական գեղարվեստական պատմումներ են, կամ սովորական վերնուշ-հաղորդումներ, համեմատաբար նեղ շրջանակների մեջ դրված վիպական ուրույն դրվագներ: Ժողովրդական ավանդությունների նյութն են կազմում բնության առանձին երևույթներն ու առարկաները, պատմական աչքի բնկնող դեպքերն ու դեմքերը, ժողովրդական կենցաղը, սովորություններն ու հավատալիքները: Ավանդությունների համար բնորոշ է սյուժեի սահմանափակությունը կամ էլ վերջինիս իսպառ բացակայությունը, ավելի իրական, քան հրաշապատում տարրի գերակշռությունը, կառուցվածքի ու ռեի պարզությունը, սեղմ ու անզարդ շարադրանքը, անձի, առարկայի և տեղի պարագայի շեշտված առկայությունը:

Ժողովրդական ավանդություններին մոտ ու աղերսակից ստեղծագործություններ են ավանդական դրույցները: Ինչու էլ հիմնականում նույն տիպի փոքրածավալ բանավոր պատմումներ, ինչ և բուն ավանդությունները, ավանդական գրույցները վերջիններից տարբերվում են գլխավորապես իրենց բովանդակությամբ: Մինչդեռ ավանդություններ մեծ մասամբ տեղագրական և պատմական բնույթի ստեղծագործություններ են, ավանդական գրույցները գլխավորաբար կենցաղական, սնահավատական և կրոնա-բարոյական հորինվածքներ են:

Ըստ իրենց բովանդակության ու բնույթի ավանդություններն ու ավանդական դրույցները հիմնականում շորս տեսակի են.

ա) Բնաշխարհիկ, ուր սլատմվում է տվյալ բնաշխարհի բաղկացուցիչ տարրերի՝ լեռների ու ձորերի, մարգագետինների ու դաշտերի, լճերի ու դետերի, առուների ու աղբյուրների, բույսերի ու կենդանիների, գյուղերի ու քաղաքների, բերդերի ու կամուրջների մասին, բացահայտվում են վերջիններիս

ծագումն ու առանձնահատկությունները, ժողովրդական ստուգաբանությամբ յուրովի մեկնաբանվում դրանց անունն ու կոչումը:

բ) Պատմական, որոնց մեջ արձագանքվում են տվյալ ժողովրդի պատմական անցյալի կարևոր իրադարձությունները, այդ իրադարձությունների մեջ ակնառու դեր խաղացած նշանավոր մարդկանց կյանքի ու դործի ուշագրավ դրվագները:

գ) Կենցաղական, որոնք բացում են մեր առաջ ժողովրդական կենցաղի ու հնավանդ բարքերի բնորոշ կողմերը, խոսուն օրինակներով ցուցադրում դրանց հետ կապված սովորութեան հարաբերություններն ու հասկացողությունները:

դ) Սեահավատական, որտեղ արտացոլում են գտել ժողովրդի հեամենի պատկերացումներն ու բմբոնումները զանազան շար ու բարի ոգիների, գերբնական էակների, բիբլիական կերպարների, կրոնի, եկեղեցու մասին և այլն:

Վիպական բանահյուսության մյուս ստեղծագործությունների հետ ունեցած իրենց հիմնական ընդհանրությունների ու տարբերությունների հետ միասին, ժողովրդական ավանդություններն ու ավանդական գրույցները ունեն ոչ պակաս բնորոշ հետևյալ առանձնահատկությունները էս:

Մինչդեռ հեքիաթը, վեպը, առակը ինքնակա նշանակությամբ ժողովրդի մեջ ապրում են անկախ կյանքով և դիտակցվում են իբրև բանահյուսական հատուկ տեսակ, ավանդությունները հիշվում ու պատմվում են պիտավորապես այն ժամանակ, երբ խոսք է լինում դրանց նյութ հանդիսացող այս կամ այն առարկայի, անձի ու արարածի (դիցուկ՝ երկնքի կամ երկրի, արևի կամ լուսնի, լեռան կամ դետի, ծառի կամ ծաղկի, կենդանու կամ թռչունի, քաղաքի կամ գյուղի, ամրոցի կամ վանքի, թագավորի կամ զորավարի, մատենագրի կամ իմաստասերի, ծաղկողի կամ գոտանի, դրողի կամ նկարչի, ճարտարապետի կամ քարտաշի) մասին: Առանց նմանօրինակ առիթ-կապակցության, որն է ավանդություն հազիվ թե հիշվի ու պատմվի:

Առանձնապես սերտ ու ամուր է ժողովրդական ավանդությունների և նյութական կուլտուրայի հուշարձանների միջև եղած կապը: Անառարկելի փաստ է այդ հուշարձանների (բերդ, կամուրջ, տաճար, վիմական արձանագրություն և այլն) ունեցած կարևոր դերը բազմաթիվ ավանդությունների ու գրույցների՝ ժողովրդի հիշողության մեջ պահպանվելու գործում:

Ուշագրավ է այս տեսանկետից ն. Մառի հետևյալ ակնարկը, որտեղ խոսվում է այն մասին, թե ինչպես Հայաստանում եղած սեպածե արձանագրությունները նպաստել են ժողովրդական ավանդությունների հարատևմանը: Իր աշխատություններից մեկում անգրագառնալով ուրարտական թագավորների սխրագործությունների վերաբերյալ Հայաստանում պատմվող ավանդություններին, ականավոր հայագետը գրում է. «...Այդ ավանդությունները զգալի օժանդակություն էին գտնում հանելուկային գրերի (իմա՝ սեպածե արձանագրությունների—Ա. Ղ.) փաստի մեջ, որոնք արդեն չէին հասկացվում, բայց որոնց մեջ ըստ ժողովրդական ավանդությունների տակավին շարունակում էին տեսնել Հայաստան աշխարհի մեծ շինարարների կատարած գործերը»¹:

¹ Н. М а р р, Надписи Сардура II, 8Е" «Археологическая экспедиция 1915 г. в Ван» գրքում, Петербург, 1922, էջ 60—61.

Շատ բնորոշ է այս առումով Վանի մոտ գտնվող հայտնի ՄՏերի դուռն իր սեպածե արձանագրություններով: Կասկածից վեր է, որ այս հնագույն հուշարձանին ենք մենք գլխավորապես պարտական ՄՏերի, հեթանոսական շրջանից եկող այդ առասպելական նշանավոր կերպարի մասին մեր ունեցած բազմաթիվ ավանդություններով ու զրույցներով¹: Բնավ պատահական չէ, որ այդ ավանդություններն ու զրույցները պահպանվել են հատկապես Վասպուրականում, մասնավորապես Վանի շրջակայքում, այնտեղ, ուր գտնվում է ՄՏերի դուռը:

Նույնը կարելի է ասել նաև Կաղզվանի գավառում գտնվող Խանդուբի բերդի մասին, որն իր մոտակայքում ապրող քնակչության մեջ երկար դարեր կենդանի է պահել Խանդուբի և Դավթի գեղեցիկ ավանդավիպը², և բազմաթիվ ուրիշ բերդերի, կամուրջների, վանքերի, խաչքարերի և այլնի մասին:

Սակայն, նյութական կուլտուրայի հուշարձանները միայն ժողովրդի հիշողության մեջ չէ, որ կենդանի ու վառ են պահել իրենց հետ ավել կամ պակաս շահով կապված ավանդություններն ու զրույցները: Նույն այդ հուշարձաններն են, որ պատճառ են դարձել նաև շատ ու շատ ժողովրդական ավանդությունների ու զրույցների գրականության մեջ մուտք գործելուն: Այս տեսակետից շատ ցայտուն է հայոց գրականության օրինակը: Բազմաթիվ հայ հեղինակներ, Խորենացուց մինչև Արուսյան և հետո, իրենց պատմական և գրական երկերում տարբեր առիթներով հիշելով կամ նկարագրելով Հայաստանում գտնվող նյութական կուլտուրայի այս կամ այն հուշարձանը, ի միջի այլոց, մեջ են բերել նաև այդ հուշարձանի հետ կապված ժողովրդական ավանդություններն ու զրույցները:

Ժողովրդական ավանդությունների ու զրույցների առանձնահատկություններից մեկն էլ այն է, որ ի տարբերություն հեքիաթի, վեպի, առակի, որոնք մեծ մասամբ ունեն իրենց հատուկ հորինողներն ու կատարողները, ավանդություններն ստեղծվում ու պատմվում են ավելի լայն շրջաններում, ո՛չ միայն ժողովրդական հայտնի ասացողների, այլև սովորական մարդկանց կողմից, որոնք ժամանակին լսած լինելով այս կամ այն բանավոր պատմություն-ավանդությունը, իրենք էլ իրենց հեթիհն, ավելի կամ նվազ հարազատությամբ ու հաջողությամբ, այն հազորդում են ուրիշներին:

Կարևոր է նշել մի հանգամանք ևս: Մինչդեռ ժողովրդական բանահյուսության գրեթե բոլոր ստեղծագործությունները ունեն իրենց ժանրը կամ տեսակը ցույց տվող որոշակի անուններ (առասպել, հեքիաթ, վեպ, առակ, երգ, առած, հանելուկ և այլն), ավանդություններն ու զրույցները ժողովրդի մեջ ապրում են, մեծ մասամբ, անանուն: Վերջիններս հիշելիս կամ դրանք վկայակոչելիս, ժողովրդի մարդիկ, սովորաբար, առանց այս կամ այն հատուկ անունը տալու, գործ են ածում՝ «պատմում են», «ասում են» արտահայտությունները, կապելով այն ավյալ պատմության նյութ հանդիսացող գլխավոր երևույթի, առարկայի, անձի կամ արարածի հետ: Այդպիսի արտահայտությունների կիրառման կոնկրետ օրինակներ են տալիս մեզ հետևյալ հայկական ավանդությունները և բազմաթիվ ուրիշ նմաններ:

¹ Շմանա ծոփք: Խմբ. պրոֆ.-դր. Մ. Աբեղյան, աշխ. Կ. Մելիք-Օհանջանյանի, Ա հատ., Երևան, 1930, էջ 931, 1031, 1083, 1125 և հան.:

² Ղ. Ի ն ճ ի ճ յ ա ն, Աշխարհագրություն, հատ. Ա., Վենետիկ, 1806, էջ 121:

«Նախիջևանից ոչ հեռու կա մի վանք, որն հայտնի է Կարմիր վանք անունով. ասում են թե Ավարայրի ճակատամարտից վերավորներին բերել են այստեղ և նրանց արչունով կարմիր են ներկվել վանքի գավիթն ու սանդուղքները: Այստեղից էլ մնացել է Կարմիր վանք անունը»:

«Պատմում են, թե երբ Լենկ-Քեմուրը հարձակվում է Աշտարակի վրա, աշտարակցիք միացած օշականցոց հետ լավ դիմագրում են թշնամուն և վերջը այնքան են նեղում նրան, որ Քեմուրը ոտից ծանր վիրավորվելով, լնփնգալով փախուստի է դիմում: Դրանից հետո նրա անունը մնում է Լենկ-Քեմուր»:

«Թալին գյուղի մոտ կա մի աղբյուր, որի մասին ասում են, թե ժամանակին մի կույր մարդ լվացվել է նրա ջրով և աչքերը բացվել են. դրա համար էլ աղբյուրը այդ օրվանից կոչվել է Լուսաղբյուր»:

«Պատմում են, որ արջը ժամանակին ջրադացսյան է եղել և որովհետև շատ գողություններ է արել՝ աստված բարկացել է վրան և արջ է դարձրել» և այլն:

Ինչ վերաբերում է «ավանդություն» և «գրույց» անուններին, ապա պետք է ասել, որ դրանք գրքային ծագում ունեն և մեզանում գործ են ածվում գլխավորապես գրականության մեջ: «Ավանդությունը» հայերենում, այլ իմաստների հետ, նշանակում է նաև սերնդե-սերունդ անցնող անգիր կամ բանավոր պատմություն: Օրինակ. հին ավանդություններ զրի առնել: Այս բանը մենք ավանդությունից գիտենք: Ավանդությունը պատմում է, թե պատերազմն այստեղ է եղել, և այլն: «Զրույցը» ի թիվս այլ առումների (խոսք, խոսակցություն, ասուլիս, համբավ, լուր, տեղեկություն, պատմություն, պատմական նյութ և այլն), գործ է ածվում նաև բերնե-բերան շրջող խոսքի, ավանդության իմաստով: Օրինակ. ժողովրդական գրույցներ: Խորենացին իբրև աղբյուր օգտվել է անդիր գրույցներից: Պատավական գրույց, և այլն¹:

Հայոց հին և նոր գրականության մեջ «ավանդություն» և «գրույց» անվանումները մեծ մասամբ գործ են ածվել համապատասխան ածականների հետ միասին: «Ավանդության» սովորական ածականներից են եղել «ժողովրդական», «բանավոր», «հին», «պատավական», «հնօրյա» ածականները, «գրույցինը»՝ «ժողովրդական», «անդիր», «վաղնջույց» «գեղջկական» և այլն:

«Ավանդություն» անվանումը հիմնականում տրվել է բնաշխարհիկ և պատմական պատմումներին: «Զրույց» անվանումը իրենց վրա կրել են գլխավորապես կենցաղական, բարոյախոսական և սնահավատական պատմումները: Պատահել է հաճախ էլ, որ տվյալ անվանումները կիրառվել են նաև իբրև համանիշներ, կամ էլ, իրենց արտահայտած նյութի բովանդակությունն ավելի որոշ դարձնելու նպատակով, ընդունել են համապատասխան բացահայտիչներ: Այսպես օրինակ. բնաշխարհիկ և պատմական բնույթի պատմումների համար՝ «ավանդության» հետ մեկտեղ, ասել են նաև՝ «գրույց», «պատմական գրույց», «առեղադրական գրույց», «կենդանական գրույց» և այլն: Կենցաղական, բարոյախոսական և սնահավատական պատմումներին, «գրույցից» բացի կոչել են նաև «ավանդություն», «կենցաղական ավանդություն», «բարոյախոսական ավանդություն», «սնահավատական ավանդություն» և այլն: Բացի այդ, ժողովրդական ավանդությունները մեր գրականության մեջ հանդես են եկել նաև

¹ Մ. Մ ա լ խ ա ս յ ա ն ց, Հայերեն բացատրական բառարան, Երևան, 1944, հատ. Ա, էջ 292, հատ. Բ, էջ 41:

հայերեն՝ «ավանդավեպ» և լատիներեն՝ «լեգենդ» (legenda) անվանումներով: Օրինակ. «ազգային ավանդավեպ», «ժողովրդական ավանդավեպ», «հայերեն լեգենդ», «կրոնական լեգենդ» և այլն:

Ժողովրդական բանահյուսության մյուս բոլոր ստեղծագործությունների նման ավանդություններն ու ավանդական գրույցները հղացվելով բանավոր ձևով, բանավոր էլ հարատևել են՝ անցնելով բերանից-բերան, սերնդից-սերունդ և դարից-դար: Ապրելով ըստ ամենայնի կենդանի ու հարաշարժ կյանքով, ավանդությունները ժամանակի հոլովումով ենթարկվել են զգալի փոփոխությունների՝ մի կողմից լրացման, խմբագրման, մշակման ու կտտարկագործման ուղղությամբ, մյուս կողմից՝ խանգարման, աղճատման, մոռացության ու քայքայման ճանապարհով: Դրան ամենից առաջ պատճառ է հանդիսացել ավանդությունների անդիր ստեղծագործություն լինելու հանրամասնը, ապա նաև նրանց արձակ պատմումի ձև ունենալը, որը, խնչպես հայտնի է, շատ ավելի է ենթակա փոփոխման, քան տաղաչափական ու սիմբոլիկ կալուսն ու որոշակի շրջանակների մեջ գրված, երբեմն էլ համապատասխան եղանակմեղեղու հետ կապված այս կամ այն չափածո երկը:

Ժողովրդական ավանդությունների և մասնավորապես պատմական ավանդությունների դարերի ընթացքում կրած փոփոխությունների պատկերը լավ գծագրված է Մ. Նալբանդյանի կողմից Պետոյանի «Սոս և Վարդիթեր» վեպին նվիրված նրա հայտնի «Կրիտիկա»-ում: Նալբանդյանն այդ առթիվ գրել է. «Ավանդությունը, որքան հեռանում են իրենց ծագման ժամանակից, այնքան շուտ կերպարանափոխ են լինում, ընկնելով ժամանակների և հասկացողության ազդեցության տակ, մինչև այն աստիճան, որ շատ անգամ դժար է լինում հասկանալ կամ մեկնել: ...Մի անցք, կամ մի իրողություն, որ ստուգապես պատահած էր, դնենք թորոսի ժամանակ, այդ բանը համարվում է եղած կամ Մինասի ժամանակ, որ շատ առաջ էր ապրել թորոսից, կամ Նիկոզոսի, որ թորոսից շատ դարեր հետո էր ծնել»¹:

Իսկ քիչ անց անդրադառնալով նույն խնդրին, Նալբանդյանը անում է հետևյալ ուշադրավ ընդհանրացումը. «Ամեն բան հնացնող և մաշող ժամանակը հնագնում և մաշում է, այո՛, շատ անգամ և իսպառ չբացնում է այս կամ այն ավանդությունը, այս կամ այն ձևը և սովորությունը: Ետ անգամ թերևս այդ բոլորը մնալով գործադրության մեջ, այնուամենայնիվ տալիս են դարերի ազդեցության իրենց հարկը. նոքա զրկվում են իրենց ներքին խորհրդից և դառնում են մի պիտակ բան...»²:

Չբավարարվելով պատմական ավանդությունների ժամանակի ընթացքում կրած փոփոխությունների փաստի լուր արձանագրումով, Նալբանդյանը փորձել է բացահայտել նաև դրա պատճառները: Նա միանգամայն իրավացիորեն պատմական ավանդությունների փոփոխման պատճառը համարում է սոցիալական պայմանների մեջ կատարված փոփոխությունները («պատճառ՝ կյանքի և ընկերական պայմանքը փոխված են»): Ըստ Նալբանդյանի՝ «ժամանակի առաջ ու հետ խաղալը ավանդություններում կախված է վերջիններիս մեջ հանդես եկող պատմական անձանց ու հերոսների, ազգի մեջ ունեցած խորհրդից, արժանավորությունից ու հատկությունից»: «Հայտնի է, — գրում է նա, — թե մի

¹ Մ. Նալբանդյան, Նրկերի լիակատար ժողովածու, Երևան, 1940, հատ. 3-րդ, էջ 144:

² Նույն տեղում, էջ 163:

պատերազմ, մի քաջագործություն, մի հաղթություն չի վերագրվիլ մի սուրբի, որպես նաև մի հրաշագործություն՝ մի երևելի դորազարի: Եթե ազգը թորոսի օրով տեսել է մի խորհրդավոր անցք, բայց թորոսի վրա բնավ համարում չունի, ազգի հետագա զավակները այդ անցքը անպատճառ կխլեն թորոսից և կվերագրեն մի մարդու, որ կամ առաջ է ապրել թորոսից կամ վերջը, որի վրա ազգը մեծ համարում ունի քաղաքականապես կամ կրոնապես, նայելով անցքի բնավորության: Ավանդությունքը, զրկվելով այսպես ժամանակագրական ճշտությունից, շատ անգամ այնքան շատ հավաքվում են մի մարդու վրա, որ այդ մարդը շատ դարերից հետո դառնում է մի պահարան, մի շտեմարան սքանչելի անցքերի ու գործերի, իսկ մյուս բոլոր մարդիկը, այն մեկ նշանավոր մարդու օգտի համար, զրկվում են իրենց ստուգապես ունեցածից»¹:

Ելնելով վերահիշյալից՝ Նալբանդյանը բացահայտել է ավանդությունների հետ կապված մի էական հանգամանք ևս, որ է՝ անվան երկրորդական դերը ավանդությունների ժամանակի որոշման դրժում:

Իբրև օրինակ վերցնելով Լուսավորչի կանթեղի ավանդությունը, նա միանգամայն ճիշտ կերպով նշում է, որ որեէ անվան առկայությունը այս կամ այն ավանդության մեջ բավական չէ այդ ավանդության ստեղծման ժամանակը որոշելու համար: Նալբանդյանը գրում է. «Լուսավորչի անունը՝ այդ ավանդության հետ խառը տեսնելով չէ կարելի պնդել, թե ստուգապես շորորդ դարումն է երևել այդ կրակը: Այո՛, կարող էր և այն ժամանակ երևիլ. մեր խոսքը այդ չէ, այլ այն, թե լոկ անունը չէ կարող ընդունվիլ որպես ապացուցություն ժամանակի, ավանդության մեջ»² (ընդգծումը մերն է — Ա. Գ.):

Ավանդությունները, ժողովրդական բանահյուսության մյուս բոլոր ստեղծագործությունների նման, իբրև զարավոր ու բանավոր, կենդանի ու հարափոփոխ կյանքով ապրած հորինվածքներ, ունեն իրենց բազմաթիվ ու բազմազան նմանակներն ու տարբերակները: Վերջիններս կարևոր ու հետաքրքիր են ոչ միայն ինքնին վերցրած, այլև այս կամ այն «բնորդ» ավանդության հիմքում ընկած պատմական իրողությունը վեր հանելու և նրա անցած ստեղծագործական ուղին պարզելու տեսակետից:

Ավանդությունների նմանակների ու տարբերակների գոյության փաստը, որը ժողովրդական բանահյուսության օրինաչափ երևույթներից մեկն է, պայմանավորված է, նախ և առաջ, համապատասխան սոցիալական պատճառներով: Միևնույն ավանդության մեջ հանդես եկող գործող անձանց արարքները, արտացոլված դեպքերի դնահատականները և այլն, հասարակական տարբեր խավերի ու դասակարգերի միջավայրում ձեռք են բերում տարբեր և ուրույն բնույթ:

Տարբերակների գոյացման գործում պակաս նշանակություն չունի նաև առանձին պատմողների կամ ասացողների կողմից արդեն անհետացած հին կենցաղի երևույթներն ու հնօրյա պատկերացումները ճիշտ շրնկալելու հանգամանքը, ինչպես նաև տվյալ անձին կամ երևույթին նրանց կողմից արվող ինքնօրինակ մեկնաբանությունը և այլն:

Հիմնականում բավական կայուն ձևով պահպանելով տվյալ «բնորդ» ավանդության սյուժեն, զլխավոր գործող անձանց անուններն ու բնավորու-

¹ Մ. Նալբանդյան, Երկերի լիակատար ժողովածու, հատ. 3-րդ, էջ 115, 145, 163:

² Նույն տեղում, էջ 145:

թյունները, միևնույն դեպքի կամ դեմքի մասին ստեղծված ավանդությունների առանձին նմանակներն ու տարբերակները, պատմվելով տարբեր վայրերում ու միջավայրերում, ստանում են տարբեր երանգավորումներ: Այդ նմանակների ու տարբերակների մեջ հեռավոր անցյալին վերաբերող դեպքերի ու դեմքերի հետ կապված մանրամասները, ժամանակի ընթացքում մոռացության են տրվում: Դրանց փոխարեն այստեղ ներմուծվում են այնպիսի նոր մոտիվներ, որոնք բնորոշ ու սաղական են ժամանակակից կյանքի փոփոխված պայմաններին և հասարակական նոր հարաբերություններին, առավել մեծ ազատություն է ստանում ստեղծագործական երևակայությունն ու հնարանքը:

Միևնույն ստեղծագործության նմանակների ու տարբերակների հետ միասին, ժողովրդական ավանդությունների մեջ մենք գտնում ենք նաև միևնույն անունով կամ թեմայով, բայց բովանդակությամբ, սյուժեով ու մոտիվներով տարբեր ստեղծագործությունների առանձին շարքեր կամ ցիկլեր: Այդպիսի շարքեր կան բնության առավել աչքի ընկնող առարկաների ու երևույթների (լեռներ, ծովեր, գետեր...), անտեսական և պաշտպանական մեծ նշանակություն ունեցող շինությունների ու ամրությունների (կամուրջ, ճանապարհ, բերդ...), պետական, քաղաքական, ուղղափառ և կուլտուրական խոշոր գործիչների (Թագավոր, զորավար, գրող...) մասին եղած ավանդությունների մեջ և այլուր:

Իբրև օրինակ, հիշենք հայ ժողովրդական բանահյուսության մեջ Մասիս և Արագած լեռների, Սևանա և Վանա լճերի, Տաթևի ու Գեղարդա վանքերի, Մեսրոպ Մաշտոցի, Վարդան Մամիկոնյանի, Շապուհ արքայի, Գր. Նարեկացու, Լենկ-Քեմուրի, Շահ-Աբասի, Դավիթ Բեկի մասին եղած ավանդությունների շարքերը և այլն:

Նմանակների ու տարբերակների պես ժողովրդական ավանդությունների առանձին շարքերի առաջացումն ու գոյությունը ևս պայմանավորված է համապատասխան պատմական, հասարակական ու ստեղծագործական հանգամանքներով: Հիմնականն այստեղ որևէ թեմայի կամ նյութի, պատմական դեպքի կամ դեմքի կարևորությունն ու մեծությունն է, նրա ունեցած բախտորոշ նշանակությունը տվյալ ժողովրդի կյանքում և դորձած ուժեղ ազդեցությունն ու տպավորությունը նույն այդ ժողովրդի երևակայության և ողջ մտաշխարհի վրա:

Ժողովրդական ավանդության յուրաքանչյուր ասացող-հեղինակ ըստ իր ստացած այդ տպավորության, ունեցած տեսազաշտի, մտեցման ու ընդգրկման կարողությունների, իր ստեղծագործության մեջ դրոշմել է տվյալ թեմայի կամ նյութի, պատմական դեպքի կամ դեմքի որևէ կողմը, սրով և գույացել են միևնույն անունով կամ թեմայով, բայց բովանդակությամբ, սյուժեով ու մոտիվներով տարբեր ավանդությունների բազմաթիվ շարքեր:

Ժողովրդական ավանդությունների առանձին շարքերը կամ ցիկլերը նշանակալից նյութ են տալիս այս կամ այն պատմական իրողության և վերջինիս ժողովրդի կողմից տրված գնահատականի վերաբերյալ ավելի ամբողջական ու ճշգրիտ պատկերացում կազմելու համար:

Ինչպես աշխատավոր ժողովրդի բանավոր ստեղծագործության մյուս բնորոշ հուշարձանները, այնպես էլ ավանդությունները բանահյուսական այլ ժանրերից անջրպետված ու մեկուսի ստեղծագործություններ չեն:

Տարբեր տիպի ավանդությունների մեջ, ավել կամ պակաս շփով, կարելի է դիտել ընդհանրապես ժողովրդական բանահյուսության և հատկապես

վերջինիս վիպական ժանրին պատկանող այլ և այլ ստեղծագործությունների առանձին տարրերը, իսկ այդ ստեղծագործությունների մեջ էլ ավանդությունների սյուժեների ու մոտիվների, ոճի ու ոգու առկայության փաստը: Սլ դա բնական ու հասկանալի է: Գալով դարերի խորքից և երկարատև շփման մեջ գտնվելով վիպական բանահյուսության մյուս ստեղծագործությունների հետ, ավանդությունները բնականորեն ենթարկվել են դրանց աղղեցությանը, իրենք էլ իրենց հերթին ներգործել այդ ստեղծագործությունների վրա:

Մի շարք ավանդություններ ժամանակի ընթացքում ձևեր են բերել առասպելական որոշ դժեր, իսկ առանձին առասպելներ էլ ստացել են պատմական ավանդության կամ զրույցի երանգավորում: Այդպիսի ստեղծագործությունների նմուշներ են մեղանում Արտավազդի, Անգեղ Տորքի, Հայկի ու Բելի, Արայի ու Շամիրամի մասին եղած պատմա-առասպելական կարճառոտ պատմումները և ուրիշ նմաններ: Հատկանշական է այն հանգամանքը, որ հիշյալ ստեղծագործությունները, մեր հին ու նոր գրականության մեջ անվանվել են մերթ «առասպել», մերթ «զրույց» և մերթ էլ «ավանդություն» բառերով:

Կան ավանդություններ էլ, որոնք ապրելով ժողովրդի բանավոր ստեղծագործության մեջ, ժամանակի ընթացքում վեր են ածվել փոքրաշունչ հեքիաթների, իսկ վերջիններիս որոշ նմուշներ էլ, փոխելով իրենց ժանրային կերպարանքը, դարձել են ավանդության կամ զրույցի նման մի բան: Այդպիսի հորինվածքների կարելի է հանդիպել կենցաղային ու այլ մոտիվներ ունեցող ժողովրդական մի շարք բանավոր պատմումների մեջ, որոնք բանահավաք-հրատարակիչների կողմից նրանց բանահյուսական ժողովածուներում զրված են մերթ ավանդությունների, մերթ էլ հեքիաթների շարքում: Նման ստեղծագործությունների բնորոշ օրինակներից են՝ «Հովիտի կամուրջը», «Իրիցկնկա աղբյուրը», «Հարսն ու կեսուրը» վերնագրով հայտնի ավանդություն-հեքիաթները կամ հեքիաթ-ավանդությունները:

Քիչ չեն և այն ավանդությունները, որոնք ժողովրդական բանահյուսության մեջ չափական ձև ու եղանակ ստանալով դարձել են վիպական երգեր, և կամ այն վիպերգերը, որոնք կորցնելով իրենց չափականությունն ու եղանակը վեր են ածվել սովորական զրույցի կամ ավանդության: Այդպիսի ավանդություն-վիպերգերի կամ վիպերգ-ավանդությունների ցայտուն նմուշներ են մեղանում Գրիգոր Նարեկացու և Ասլան Աղայի մասին, եղած հանրահայտ արձակ ու չափածո վիպական ստեղծագործությունները:

Առանձնապես մոտ ու օրգանական է ավանդությունների կապը ժողովրդական վեպի կամ էպոսի հետ: Բանագիտության մեջ վաղուց ընդունված և համապատասխան փաստական նյութով հաստատված է այդ հանգամանքը: «Ժողովուրդների և դասակարգերի կյանքում կարևոր նշանակություն ունեցող դեպքերը, — կարդում ենք մենք այդ առթիվ «Մասնա ծոերի» Ա. հատորի ներածության մեջ, — խոր տպավորություն թողնելով մասնակիցների և նրանց շրջապատի վրա՝ սովորաբար առաջ են բերում բազմաթիվ զրույցներ, անհատականորեն խիստ երանգավորված պատմվածքներ ու երգեր, ապա մի քանի սերունդ հետո կազմվում են հաճախ նաև ընդարձակ ավանդություններ: ... Այսպիսի ավանդություններն ու պատմական երգերը, որոնք հորինվում են զանազան ժամանակներում, սկզբում անջատ-անջատ են ապրում շահագրգռված հասարակության մեջ, բայց հետագայում դրանք հետզհետե օրգանապես միացվում են: Այս վերջին դեպքում զանազան պատմական անձերի մասին հյուս-

ված գրույցներն ու երգերը համախմբվում են այս կամ այն կենտրոնական, մեծագույն ազդեցություն ունեցող կամ բացառիկ համբավ վայելող պատմական դեմքի շուրջը, և այսպիսով ստեղծվում է վիպական երգերի ու գրույցների մի ցիկլ, ապա և ամբողջական վիպասանություն: Այստեղ իրար հետ միացած պատմվում են ոչ միայն կենտրոնական դեմքի պատմական սխրագործությունները, այլև նախորդ ու հաջորդ շրջաններից նույն տոհմի կամ անգամ այլ տոհմերի նույնանուն կամ տարրեր անունով հերոսների պատմական գործերը, ինչպես նաև ամեն տեսակի գրույցներ և ավանդություններ¹:

Այսպես են ահա ծագել բոլոր ժողովուրդների հին ու նոր հերոսական մեծ վեպերը, այդ թվում նաև հայ ժողովրդի ազգային մեծ էպոս՝ «Սասնա ծռերը» կամ «Սասունցի Դավիթը»: Վերջինիս մեջ ներթափանցած հնօրյա ավանդություններից ու ավանդական գրույցներից, իրեն օրինակ, կարելի է հիշատակել Սասնո Սանասարի գրույցը՝ վեպի «Սանասար և Բաղդասար» ճյուղից, Տարոնի ու Մուշեղի գրույցը՝ «Դավիթ և Խանդավ» ճյուղից, Փոքր Մհերի՝ Տոսպան բլրի մեջ կամ Ազովու քարում փակվելու ավանդությունը՝ «Փոքր Մհեր» ճյուղից, և այլն²:

Ինչ վերաբերում է ավանդությունների ճակատագրին, ապա պետք է նշել, որ այն հիմնականում նույնն է, ինչ և էպոսի ու ժողովրդական բանահյուսության մի քանի այլ տեսակների ճակատագիրը: Վերջիններիս նման ավանդությունները ևս իրենց կենտրոնակետներ պահպանում են այնքան ժամանակ, որքան ժամանակ իրականության մեջ դեռ գոյություն է ունենում նրանց ծնող ու սնող հասարակական հողը: Այդ հողի խարխուման և հին կենցաղի ու հասկացողությունների վերափոխման հետ միասին հետզհետե մոռացության են տրվում նաև հնօրյա ավանդություններն ու գրույցները: Դրա հետ մեկտեղ, հասարակական-քաղաքական կյանքում և ժողովուրդների պատմական գոյավիճակի մեջ կատարված նոր ու կարևոր տեղաշարժերը (ազգային ազատագրական պայքար, ազգամիջյան ու քաղաքացիական կռիվներ, հեղափոխություն, համաշխարհային պատերազմ), հողեր կյանքում և մշակույթի մեջ տեղի ունեցած խոշոր իրադարձությունները նոր նյութ տալով ժողովրդական ստեղծարարների ստեղծագործական երևակայությանը, հիմք են դառնում նոր ավանդությունների ու գրույցների հորինման համար, որոնց մեջ լայնորեն օգտագործվում են տվյալ ժանրի անցյալից եկող լավագույն տրագիցիաները (սյուժե, մոտիվ, վիպական կերպարների ստեղծման եղանակ, արտահայտչական ձևեր և այլն):

Այդպիսի նոր ու նորագույն ստեղծագործությունների բնորոշ օրինակներին են հայ իրականության մեջ խաչատուր Աբովյանի, Միքայել Նալբանդյանի, Բաֆթու, Թումանյանի, Կոմիտասի, Իսահակյանի և ուրիշների մասին 19 և 20-րդ դարերում ստեղծված ավանդություններն ու գրույցները, որոնց մեջ հայ ժողովուրդը յուրովի արտացոլել է իր հարազատ զավակների կատարած ազդանվեր, հայրենասիրական, հերոսական, կուլտուր-լուսավորական ու ստեղծագործական մեծ սխրանքներով ու տառապանքներով լի կյանքի ու գործունեության առավել աչքի ընկնող դրվագները:

¹ «Սասնա ծռեր», հատ. Ա, Երևան, 1936, էջ 7—8: Խմբագրեց պրոֆ.-դր. Մանուկ Աբեղյան, աշխատակցությամբ Կ. Մելիք-Օհանջանյանի:

² Մ. Աբեղյան, հայ ժողովրդական վեպը, Թիֆլիս, 1908, էջ 95, 98—109, 181 և հան:

Այդպիսի նորոգ ստեղծագործություններից են տարբեր ժողովուրդների, այդ թվում նաև հայ ժողովրդի, ժամանակակից բանահյուսության մեջ կենդանի մասին ստեղծված բազմաթիվ դրույցներն ու ավանդությունները, որոնց մեջ, ինչպես դիտված է, կենդանի հասցված է «հնության առասպելական հերոսի՝ Պրոմեթեոսին հավասար բարձրության»¹:

2

Մեծ է ժողովրդական ավանդությունների թե՛ պատմական և թե՛ ճանաչողական նշանակությունը: Ճիշտ է, նրանց մեջ հաճախ բացահայտվում է ստույգ ժամանակագրությունը, երբեմն շփոթվում են պատմական դեպքերն ու դեմքերը, մի պատմական անձնավորության կատարած գործը վերագրվում է մեկ ուրիշի, բայց, այդուհանդերձ, նրանք չեն դադարում կարևոր պատմական սկզբնաղբյուրներ և «պատմությունը յուսավորող ճառագայթներ»² լինելուց, քանզի նրանց մեջ յուրովի դրսևորված է բուն պատմական իրականությունը և իշխում է պատմության կուլ ու վավերական տրամաբանությունը:

Խոսելով ժողովրդական բանահյուսության պատմական և ճանաչողական անուրանալի արժեքի մասին, Մ. Գորկին նշել է, որ «Աշխատավոր ժողովրդի իսկական պատմությունը չի կարելի խմանալ, առանց իմանալու ժողովրդական բանավոր ստեղծագործությունը», որը «ամենահին ժամանակներից անբաժան և յուրահատուկ կերպով ուղեկցում է պատմությունը»³:

Այդ բանը ամենից շատ և առաջին հերթին վերաբերում է էսոսին, ապա նաև ժողովրդական ավանդություններին: Առանց գերազանցատելու ավանդությունների պատմական արժեքը կարելի է ասել, որ դրանք իրոք ժողովրդական բանահյուսության այն ստեղծագործություններից են, որոնք զգալիորեն հարուստացնում են մեր ունեցած տվյալներն անցյալի վերաբերյալ, իսկ մի շարք դեպքերում էլ, այլ կարգի նյութերի բացահայտության պայմաններում, ձեռք են բերում եղակի պատմական սկզբնաղբյուրների նշանակություն:

Ժողովրդական ավանդությունների պատմական և ճանաչողական խոշոր արժեքը պայմանավորված է նրանց հիմնականում ռեալիստական ստեղծագործություններ լինելու հանդամանքով: Ճիշտ է, այդ ռեալիզմը ինչպես ընդհանրապես ժողովրդական բանահյուսության, այնպես էլ ավանդությունների մեջ, իր բնույթով «նախակերտ ռեալիզմն» է, բայց այնուհանդերձ այն ինքնին ռեալիզմ է:

Ավանդությունների լավագույն նմուշները ծնվել են ոչ թե դիպվածով, պատահական դեպքերի շուրջը, այլ ստեղծվել են ժողովրդի համար կենսական ու բախտորոշ նշանակություն ունեցող սոցիալ-քաղաքական անցուղարձերի կասկեցություններ: Նրանց մեջ կյանքը դիտված է ժողովրդի տեսանկյունից և հարազատորեն ու լայնորեն արտացոլված է նույն այդ ժողովրդի ողջ կենսագրությունը, նրա էթնիկ ձևավորման պրոցեսը, ապրած աշխարհագրական-քնական միջավայրը, պատմական գոյամիճակն ու ճակատագիրը և ժամանակի իրականությունն առհասարակ:

¹ Մ. Գորկի, Գրական-հրատարակատեսական հոդվածներ, Երևան, 1949, էջ 293:

² Գ. Սրվանձատյան, Թորոս աղբյուր, Կ. Պոլիս, մասն Ա, էջ 259:

³ Մ. Գորկի, Գրական-հրատարակատեսական հոդվածներ, Երևան, 1949, էջ 292:

Այդ է պատճառն ահա, որ ժողովրդական ավանդությունները թե՛ հնում և թե՛ նոր ժամանակներում, իբրև կարևոր պատմական սկզբնաղբյուր, բառ արժանավուն գնահատվել և օգտագործվել են տարբեր ժողովուրդների մի շարք ականավոր պատմիչների և դիտություն ալլ բնագավառների ներկայացուցիչների կողմից:

Իբրև առավել բնորոշ օրինակ հիշենք «պատմության հայր» անվանված Հերոդոտոսին, որի նշանավոր «Հույն-պարսկական պատերազմների պատմության» մեջ նշանակալից տեղ են գրավում հնօրյա ավանդություններն ու զրույցները, Ֆ. Էնդելսին, որն իր «Ընտանիքի, մասնավոր սեփականության և պետության ծագումը» հայտնի աշխատության մեջ, անցյալ հասարակական-տնտեսական պարբերաշրջաններում գոյություն ունեցող իրավական, կենցաղային և այլ կարգի երևույթներն ու հարաբերությունները վերականգնելու և բնութագրելու, մասնավորապես հնօրյա տոհմերի ու ներտոհմային հարաբերությունների ծագումն ու առանձնահատկությունները պարզելու համար, այնքան յուրջ նշանակություն է տվել ժողովրդական ավանդություններին ու զրույցներին¹:

Հայ պատմիչներից հիշենք «քերթողահայր» Մ. Խորենացուն, որն իր քննախույզ մտքով թափանցել է հայոց վաղնշական դարերի առասպելական զրույցների ու պատմական ավանդությունների իրական-կենսական միջուկի խորքը: Խորենացու կարծիքով, ժողովրդի մեջ պատմվող այդ զրույցներն ու ավանդությունները այնպիսի ստեղծագործություններ են, որոնք «ճշմարտութիւն իրացն ալլարանաբար յինքեանս ունին թաքուցեալ»²: Ահա թե ինչու նա իր Պատմության մեջ մեկնելով ու վեր հանելով այդ ստեղծագործությունների մեջ եղած «հավաստի» պատմական կամ բնական իրողությունը, խելամտորեն օգտագործել է որանք իբրև պատմական կարևոր սկզբնաղբյուր:

Ժողովրդական ավանդությունների, մասնավորապես հայկական ավանդությունների մասին, իբրև «հարուստ պատմական աղբյուրի» տարբեր առիթներով արտահայտվել է նաև Բաֆֆին: Մեծ գրողը իրավացիորեն ավանդությունները համարել է «այն թանկագին ժառանգությունը», որը «կարող է լույս զցել մեր ազգի խորին առասպելա-միպական անցյալի վրա»³: Բաֆֆու համոզմունքով ավանդություններն ու զրույցները կարող են զգալիորեն լրացնել մեր պատմագրության մեջ ժողովրդական կյանքի վերաբերյալ եղած տեղեկությունների ճկատելի բացը: Այդ առթիվ նա գրել է. «Մեր ժողովրդի մեջ մինչև այսօր իրանց սկզբնական պարզությամբ պահպանվել են՝ զանազան ավանդություններ... զրույցներ և այլն: Իրանք այնպիսի խորին կապ ունեն մեր ամենահին անցյալի հետ, որ մասամբ կարող են լրացնել այն թերությունները, ինչ որ նկատվում են մեր պատմագրության մեջ... Որպես բնագետ մի կենդանու քարացած ժանիքից կազմում է մի ամբողջ զաղափար նրա մարմնի կաղմվածքի մասին, նրա ջրհեղեղյան գոյության մասին, այնպես և հետախույզ հնագետը մի ժո-

¹ Տես՝ Ֆ. Էնդելս, Ընտանիքի, մասնավոր սեփականության և պետության ծագումը, Երևան, 1948, էջ 36—37, 80—82, 137, 159:

² Մ. Խորենացի, Պատմութիւն հայոց, Տփլիս, 1913, դիրք Ա, գլ. Գ, էջ 12, հավելված Ա., էջ 90:

³ Բաֆֆի, Խամայի մելիքությունները, Թիֆլիս, 1893, էջ 286: Բաֆֆի, Գրականության մասին, Երևան, 1938, էջ 57:

ղովրդական ավանդությունից կարող է եզրակացնել նույն ազգի անցյալ կյանքի այս և այն ձևերը»¹:

Վեր հանելով ժողովրդական ավանդությունների ու դրույցների էական նշանակությունը հայոց պատմության ինչպես հնագույն, այնպես էլ ավելի նոր շրջանների ուսումնասիրության համար, Բաֆֆին միաժամանակ չի մոռանում նաև ընդգծել այն դժվարությունները, որ ծառանում են ավանդություններն իրրև պատմական սկզբնաղբյուր օգտագործել ցանկացողի առաջ, դրանց ստեղծագործական ու ժանրային յուրահատուկ առանձնահատկությունների պատճառով: «Հայտնի բան է,— գրում է նա,— որ միայն ժողովրդական ավանդությունների վրա հիմնվելով, շատ դժվար կլինեի կազմել մի քանի դարերի շարունակ պատմությունը: Ժողովուրդը շատ անգամ շփոթում է անցքերը, մեկի գործողությունը մյուսին է վերաբերում, և ամենադժվարինն այն է, որ ժամանակագրական և տոհմագրական ճշտություններ չէ պահպանում, պատմական իրողությունները տեղափոխում է կամ շատ առաջ և կամ շատ հետո: Բացի դրանցից, ժողովուրդն ունի յուր լեզունդները, յուր իղեպանները, յուր սիրած հերոսները, որոնց ընծայում է նա այնպիսի մեծագործություններ, որ չլին կարող նրանց կատարածը լինել... Բայց պատմական փաստը դարձյալ մնում է իրրև իրողություն, միայն հարկավոր է նրա կատարող տերը գտնել»²:

Սակայն, ժողովրդական ավանդությունները միայն պատմական վավերականներ չեն: Դրանք ոչ պակաս նշանակալից են նաև իրենց գաղափարական բովանդակությամբ, իբրև ժողովրդի հոգեկան աշխարհի կենդանի ու խոսուն հուշարձաններ:

Ավանդությունների մեջ ճշմարտացի և յուրօրինակ ձևով արտացոլված է ավելի ժողովրդի՝ պատմական որոշակի ժամանակաշրջանում, սոցիալ-տնտեսական և հասարակական-քաղաքական համապատասխան պայմաններում գոյացած ու ձևավորված հոգեբանությունը, նրա ազգային բնավորության առանձնահատկությունները, նրա մտորումներն ու նվիրական դրացմունքները, դավանած գաղափարներն ու փայփայած երազանքները:

Ժողովրդական բանահյուսության մյուս լավագույն ստեղծագործությունների նման, ավանդությունների մեջ ցայտուն կերպով արտահայտված է աշխատավոր ժողովրդի ստողը կենսափիլիսոփայությունը, նրա լավատեսությունն ու մարդասիրությունը, ազատասիրությունն ու հայրենասիրությունը, աշխատասիրությունն ու խաղաղասիրությունը, նրա խոր դիտակցությունը սեփական ուժի անխորտակելիության և իր անմահության ու հավերժության մասին, նրա վառ հավատը իր վերջնական հաղթանակի և լավագույն ապագայի նկատմամբ:

Ժողովրդական բանահյուսության մյուս լավագույն ստեղծագործությունների հերոսների նման, ավանդությունների հերոսները ևս բնության սթաբիլիտետի և հասարակական կյանքի շար ուժերի դեմ ժողովրդի մղած դարավոր համառ մարտումների փայլուն անձնավորումներն են, նրա խիզախության, անվատ կամքի, անձնագործության ու այլ հոգեկան բարեմասնությունների կենդանի կրողները:

¹ Բ ա ֆ ֆ ի, Գոսպանության մասին, Երևան, 1958, էջ 57—58:

² Բ ա ֆ ֆ ի, Խամսայի մեկիբությունները. Թիֆլիս, 1895, էջ 297:

Շատ բնորոշ է այս առումով Խ. Աբովյանի հայացքը Հայկի ու Քելի, Արայի ու Շամիրամի, Տիգրանի ու Աժդահակի, Տրդատի և այլոց առասպելական գրույցների ու պատմական ավանդությունների մասին, իբրև հայ ժողովրդի ազատասիրական ոգին, նրա բուռն հայրենասիրությունն ու հերոսականությունը ցայտուն կերպով մարմնավորող բանավոր հուշարձանների:

Իր «Կերք Հայաստանի» մեջ իհարկե բուն միպական շնչով նկարագրելով դեղեցի անվանի դուրացի Նովակիմի և սրա քաջարի գինակից-ընկերների՝ իտական ժողովրդական այդ միջոցների կատարած անօրինակ սխրանքները, Աբովյանը նրանց այդ սխրանքների հոգն ու զինարանը համարում է նրանց հարազատ բնաշխարհն իր բնական հրաշալիքներով, պատմական նշանավոր հուշարձաններով և վերջիններիս հետ կապված ժողովրդական հնօրյա հերոսավեպերով ու հայրենանվեր ավանդություններով, հակադրելով դրանք տերթոդիկյան վարժարաններում սուուցանվող «անսիրտ պատմություններին»:¹ Նա գրում է. «...Ամեն քար նրանց համար գիրք ա, ամեն ասպառած նրանց համար պատմություն, ամեն հին բերդ, քանդված մատուռ կամ եկեղեցի, որ սար ու ձոր լիքն են էստեղ, նրանց համար կենդանի վարժապետ: Ամեն դերեզման, ամեն արձան նրանց համար կենդանի վկա, ու պատմադիր...»:

Ժողովրդական ավանդությունների գաղափարական բովանդակության բնութագրման համար հատկանշական է նաև Ավ. Իսահակյանի հետևյալ ասույթը, ըստ որի ավանդությունները կամ լեզենդները ոչ այլ ինչ են, բայց եթե՝ «մի որևէ ժողովրդի լավի, ազնիվի, վեհի, գեղեցկի ցանկությունների իրականացումները»²:

Ժողովրդական ավանդությունները աչքի են ընկնում նաև իրենց գեղարվեստական անժխտելի արժանիքներով: Նրանց մեջ հիանալի կերպով դրսևորված է ժողովրդի ստեղծագործական վառ երևակայությունն ու պատկերավոր մտածողությունը, ժողովրդական բանավեպի անսպառ գանձերի գունագեղ արտահայտչականությունը:

Անհրաժեշտ է առանձնապես նշել ավանդությունների մեծ վարպետությունը ու բարձր արվեստով կերտված լավագույն տիպերի ու կերպարների մասին, որոնք ժողովրդական բանահյուսության մյուս ստեղծագործությունների լավագույն տիպերի ու կերպարների նման, հանդես են գալիս համապատասխան տիպիկական հանգամանքներում: Նրանք աչքի են ընկնում իրենց խորությունը ու պայծառությունը, իրենց գեղարվեստական կատարելությունը: Նրանց ստեղծման մեջ «ներդաշնակորեն զուգակցվել են ուսցիտն և ինտուիցիան—միտքն ու զգայմունքը»³:

Ժողովրդական ավանդությունների մեջ հանդես եկող լավագույն տիպերի ու կերպարների մասին, որոշ վերապահությամբ, կարելի է ասել այն, ինչ ասել է Հեգելը էպոսի կերպարների մասին. այն, որ դրանց մեջ «ազգը խտանում է առանձին անհատների կերպարանքով», որ դրանք «իրենց ինքնօրինակության մեջ բովանդակում (ամփոփում) են համընդհանուրը», որ դրանք «ինքնըստ-

¹ Խ. Աբովյան, Երկերի լիակատար ժողովածու, Երևան, 1948, հատ. III, էջ 54, 93, 96, 180:

² Ավ. Իսահակյան, Խոսքեր, «Գրական թերթ», 1960, № 44: Նյութերը հեղինակի արխիվից քաղել և հրատարակել է Ա. Բնճիկյանը:

³ Ա. Գորգի, Գրական-հրապարակախոսական հոդվածներ, Երևան, 1949, էջ 283—284:

ինքյան ամբողջական մարդիկ են հանդիսանում և ունեն դժերի ամբողջականություն»¹։

Իբրև նման կարգի տիպերի ու կերպարների բնորոշ օրինակներ, հիշենք Հերկուլեսին, Պրոմեթեոսին, Փաուստին, հիշենք մեր Հայկին, Արտավազդին, Մհերին։

Ժողովրդական ավանդությունների տիպերն ու կերպարները չուրովի դժբախտում են ավյալ սոցիալ-պատմական երևույթի և ավյալ սոցիալական ուժի բուն էությունը։ Դրանք արգասիք չեն չոկ երևակայության, այլ հիմնականում օրինաչափ ու անհրաժեշտ արտահայտություն են իրական փաստերի, վերջիններիս հիման վրա կատարված գեղարվեստական-բանահյուսական ուրույն ընդհանրացումներ։

Իրենց գաղափարական ու գեղարվեստական բարձր արժանիքների համար ժողովրդական ավանդությունները գրավել են տարբեր երկրների մի շարք հին ու նոր ականավոր գրողների ու արվեստագետների ուշադրությունը, դնահատվել ու ստեղծագործորեն օգտագործվել են նրանց կողմից։

Իբրև ցայտուն օրինակներ, հիշենք՝ Հովհաննիսյանի ու Դանթեին, Միքելանջելոյին ու Մաֆայելին, Շեքսպիրին ու Գյոթեին, Պուշկինին ու Տոլստոյին, Բալզակին ու Միցկևիչին, որոնք իրենց ստեղծագործությունների ղոնքեր մեկից ավելի անգամներ բաց են արել հավաքական հանձարի այդ գոհարների առաջ։

Հայ հեղինակներից հիշենք հատկապես Հովհ. Թումանյանի և Ավ. Իսահակյանի անունները, որոնց մի ամբողջ շարք լավագույն ստեղծագործությունները (առաջինի՝ «Աղավնու վանքը», «Թագավորն ու շարչին», «Ախթամարը», «Թմկաբերդի առումը», Երկրորդի՝ «Հայրենի հողը», «Ժողովրդի քնարը», «Մոր սիրտը», «Հավերժական սերը» և այլն) գրված են համապատասխան ժողովրդական ավանդությունների հիման վրա։

Չափազանց ուշագրավ է նաև Հովհ. Թումանյանի կարծիքը ավանդությունների՝ ժողովրդի «հանձարի», նրա «ոգու և մտքի», «բնավորության, աշխարհայացքի ու շնորհքի» այդ «լավագույն ծնունդների»² գրականության դարգացման համար ունեցած կենսական կարևոր նշանակության մասին։

Իր նամակներում և հոդվածներում բազմիցս անդրադառնալով ժողովրդական ավանդություններին ու կրույցներին, ժողովրդական բանահյուսության իջամենասիրած ժանրերից մեկին, Թումանյանը դրանք համարել է «սրանչիլի» և «հրաշալի» բաներ, «մեր գրականության հարազատ հողն ու պատվանդանը», այն աղբյուրը՝ «որտեղից պետք է խմի հայոց բանաստեղծը, հայոց վիպասանը, հայոց գրողը, որ ղորանա»³։ Նա գտնում է, որ՝ «Ամեն մի ազգի բանաստեղծություն ժողովրդական լեզուններով, ազգային ոգու ստեղծագործություններով է ղորանում ու ինքնուրույնության կնիք առնում, հաստատվում, առաջ գալիս, որպես մի ամբողջ ժողովրդի խոսք և դրանով էլ ղառնում պատկանելի»⁴։

¹ Гегель, Сочинения, том XV, М., 1958, стр. 251, 252, 280.

² Հովհ. Թումանյան, Երկերի ժողովածու, հատ. IV, էջ 113, հատ. VI, էջ 65—66, 113։

³ Նույն տեղում, հատ. V, էջ 150, 269, հատ. VI, էջ 65—66։

⁴ Նույն տեղում, հատ. V, էջ 147։

Մի ուրիշ անգամ էլ, անդրադառնալով հայոց լեզվի ու գրականության զարգացման գործում ժողովրդական բանահյուսության, այդ թվում նաև ավանդույթունների խաղալիք կարևոր դերին, Թումանյանը գտնում է, որ «մեր լեզվի ու գրականության առողջ զարգացման համար պետք է... մշտական տեղ հատկացնել հայրենի երկրի ժողովրդական բանավոր գրականությանը, նրա ամեն տեսակ ավանդույթուններին, հեքիաթներին, առակներին, առածներին...»¹:

Վեր հանելով ժողովրդական ավանդույթունների պատմական, գաղափարական և գեղարվեստական արժանիքները, չի կարելի սակայն անտեսել այն հանգամանքը, որ նրանց մեջ երբեմնապես հանդիպում են նաև նվազ արժեքավոր ու անմշակ ստեղծագործություններ, աշխատավոր ժողովրդի հիմնականում առողջ ու առաջավոր էությունն ու բնավորությանն անհարիր որոշ հորինվածքներ, նրա աշխարհայացքի պատմական սահմանափակության հետ կապված նախապաշարժունքային, պահպանողական ու հետադիմական որոշ մոտիվներ:

Ժողովրդական բանահյուսության մյուս ժանրերի մեջ առկա նմանօրինակ այլ հորինվածքների ու մոտիվների նման, վերոհիշյալ կարգի ավանդույթունների գոյությունը հետևանք է աշխատավորական խավերի անցյալում ապրած իրավազուրկ, ճնշված ու անազատ գոյավիճակի: Իրանց մեջ, իբրև գերազանցապես գյուղացիական ստեղծագործությունների, ճշմարտացի արտացոլումն է գտել նաև գյուղացիության որոշ շերտերի մանրբուրժուական հոգեբանությունը, նրանց հետամնացությունը, հեռավոր անցյալի հավատալիքներով ու կենցաղի վերադարձներով կաշկանդված լինելը, ինչպես նաև շահագործող դասերի ու դասակարգերի հայացքների ու հոգեբանության ազդեցության որոշ հետքերը: Այս առումով առանձնապես բնորոշ են դարերի ընթացքում քրիստոնեական եկեղեցու գաղափարների անմիջական ազդեցությամբ ստեղծված կրոնական ավանդույթունները:

Այս առնչությամբ չի կարելի դարձյալ շփոթել Մ. Նալբանդյանի հայտնած մտքերից մեկը ավանդույթունների մասին: Մեծ հրապարակախոս-քննադատը ժողովրդական բանահյուսության, այդ թվում նաև ավանդույթունների մեջ, բուն ժողովրդական ստեղծագործությունները տարբերել է սոցիալական վերնախավերի տրամադրություններն ու հոգեբանությունն արտացոլող երկերից, վեր հանելով առաջինների արժանիքները, և, ընդհակառակը, սուր քննադատության ենթարկելով վերջինների վնասակար և հակաժողովրդական բնույթն ու էությունը: Նալբանդյանը հիացմունքով է արտահայտվել, օրինակ, Պոռչյանի «Սոս և Վարդիթեր» վեպում մեջ բերված շղթայված Արտավազդի ավանդության մասին, որի մեջ աշխատավոր ժողովուրդը սիմվոլացրել է շարք սանձահարելու իր կորույն ու կամքը, դարբինների ձեռքով ամրացնել տալով աշխարհին կործանում սպառնացող Արտավազդի շղթաները: Նա գրել է. «Ազգային ավանդույթուն է դարբինների սալը ծեծելը, որ Արտավազդը դուրս չգա ու աշխարհը չքանդի. և մենք մեծ ուրախություն զգացինք, երբ տեսանք (եր. 42), որ տակավին պաշտվում է այդ անտիկյան ավանդույթունը, թեև այդ էլ կրոնական գույն է ստացել դարձյալ, որովհետև Ավագ ուրբաթի գիշերն է միայն կատարվում: Բայց, ինչպես և է, այնուամենայնիվ ավանդույթունը կենդանի է,

¹ Հոդ. Թումանյան, Երկերի ժողովածու, հատ. IV, էջ 112, 113:

և այն պատմական ավանդությունն, որի լոկ հիշելը բերում է մարդու երևակայության առջև ամբողջ հայ աշխարհը, որի վրայից արդեն գլորվել են շատ դարեր»¹։

Ճիշտ հակառակ կարծիք է հայտնել Նալբանդյանը նույն «Սոս և Վարդիթերի» մեջ բերված հրաշագործ դավադանով շոր ակղից ջուր հանող սուրբ Ականատեսի կրոնական ավանդության մասին, գրելով. «Քայց խոստովանում ենք, որ Ականատեսի ավանդությունը (Եր. 108) չունի մի դորա նման արժեք։ Անշուշտ հեղինակը չէ շարադրել նորան, նա առնում է ազգի հասկացողությունից. բայց մենք մի փոքր առաջ ասածներս վերստին կրկնում ենք, թե դպրության և լուսավորության խորհուրդը այն չէ, որ ամեն անցած խավար լույս բարոզե, ամեն դարերի ժանրության տակ ճնշվածին անխտիր ծուր դնե, այլ որպեսզի փարատե այդ խավարը։ Այդ տեսակ բաները, մեր կարծիքով զգուշության պետք ունին, և հեղինակը հանդես հանելով մի նմանօրինակ բան, պարտական է այնպիսի ընթացք տալ բանին, որ տասն և ինն դարու մեջ, ութերորդ ամենախավար դարին արձագանք եղած չլինի»²։

Քննադատաբար վերաբերվելով վերոհիշյալ կարգի ավանդություններին, պետք է պատմական մոտեցում ունենալ դրանց նկատմամբ։ Անհրաժեշտ է, նախ և առաջ, հաշիվ առնել այն հասարակական և դադափարական միջավայրն ու պայմանները, որոնք ծնունդ ու սնունդ են տվել այդ հորինվածքներին ու մոտիվներին, և ապա, որ նույնպես կարևոր է, շմոռանալ նաև այն հանգամանքը, որ քննության առարկա ստեղծագործությունները հաճախ խստորեն քննադատված, հերքված ու հաղթահարված են իր իսկ ժողովրդի կողմից, իբրև նրա հոգուն անհարազատ ու եկամուտ բաներ, իբրև նրա թույլ կողմեր։

Ամփոփենք։ Ժողովրդական ավանդություններն ու ավանդական գրույցները ընդհանրապես արտացոլում են այս կամ այն ժողովրդի ապրած բնական ու հասարակական միջավայրը, նրա պատմական ճակատագիրը, ազգային քնավորության առանձնահատկություններն ու հոգեբանությունը։ Դրանց մեջ քիչ չեն այնպիսիք, որոնք աչքի են ընկնում սոցիալական, քաղաքական ու փիլիսոփայական ընդհանրացումների ճշմարտացիությամբ ու խորությամբ և ունեն կուլտուր-պատմական ու գրական-գեղարվեստական մեծ արժեք։ Ժողովրդական բանահյուսության ուրիշ, առավել ինքնատիպ և բուն ազգային ստեղծագործությունների հետ միասին, ավանդությունները հանդիսանում են այն կարևոր ներդրումներից մեկը, որ տվյալ ժողովուրդը մտցնում է համաշխարհային մշակույթի ընդհանուր գանձարանը, լրացնելով ու հարստացնելով այն։ Այդպիսի ստեղծագործություններ են ըստ ամենայնի նաև հայ ժողովրդի կողմից դարերի ընթացքում հորինված հազարավոր ավանդությունները։

¹ Մ. Նալբանդյան, Երկերի լիակատար ժողովածու, հատ. III, էջ 137—138։

² Նույն տեղում, էջ 138։

СУЩНОСТЬ И ЖАНРОВЫЕ ОСОБЕННОСТИ НАРОДНЫХ ПРЕДАНИЙ

А. Т. ГАНЛАНЯН

(Р е з ю м е)

Предания являются малоисследованными произведениями народного творчества. Ни в армянской, ни в какой-либо другой литературе нам не известна работа, раскрывающая их сущность и жанровые особенности. Настоящая статья является попыткой в этом направлении, осуществленной на основе богатого материала преданий (в особенности армянских), собранных нами, с использованием также соответствующих высказываний классиков армянской литературы.

Подобно эпосу, предания являются наиболее самобытными и интересными произведениями народного творчества и имеют значительную как познавательную, так и идейно-художественную ценность. В народных преданиях живыми образами, на основе глубокой осведомленности трудящегося большинства данной страны, ярко отражаются природа этой страны со своими характерными особенностями, своеобразие быта, обычаев и верований народа, экономические и общественные, политические и культурные явления, противоречия и борьба между различными племенами и племенными группами, сословиями и классами и т. д.

Предания принадлежат к числу эпических произведений народного творчества. Подобно другим основным видам произведений этого жанра (миф, сказка, эпос, басня), они природу и человеческие, общественные явления и отношения отображают в эпической форме. Имея ряд существенных общих черт с другими произведениями эпического творчества, предания отличаются и рядом не менее важных особенностей, благодаря которым они занимают особое место в ряду указанных выше произведений.

Предания представляют собой произведения малого объема, состоящие иногда всего лишь из нескольких предложений, и имеют характер поучительных художественных сказов или просто воспоминаний. Для преданий характерны: ограниченность рамок сюжета, преобладание скорее элементов действительного, чем сказочного, ясность и простота построения и стиля, сжатое и неприукрашенное изложение, подчеркнутое наличие обстоятельства личности, предмета и места.

Велико как историческое, так и познавательное значение народных преданий. Правда, зачастую в них отсутствует точная хронология, иногда путаются исторические события и личности, деяния одной исторической личности приписывается другой, но, тем не менее, они не перестают быть историческими первоисточниками и важными материалами, освещающими историю, ибо в них в своеобразной форме проявляется историческая действительность, выступает твердая и истинная логика истории.

Народные предания, являясь историческими эпическими документами, в то же время ценны и как живые памятники народной души. В преда-

ниях отражаются психология данного народа, сформировавшаяся в определенную историческую эпоху, в соответствующих социально-экономических и общественно политических условиях, особенности национального характера народа, его заветные мысли и чувства, его идеи и взлелеянные мечты. Подобно другим лучшим произведениям народного творчества, в преданиях ярко выражена здоровая жизненная философия трудового народа: его гуманизм и оптимизм, свободолюбие и патриотизм, его глубокая вера в несокрушимость своей силы, в свое бессмертие.

Вместе с другими, наиболее самобытными произведениями народного творчества предания являются важным вкладом, который народ вносит в общую сокровищницу мировой культуры, восполняя и обогащая ее. Именно такими произведениями являются и тысячи преданий армянского народа, созданных им в течение многих веков.